

## Iccitiwwan Galii-Kutaa 2ffaa

### Description

**6. Karaa sirrii irratti fi haala sirriin baasu**— namoonni baay'een qabeenya yommuu argatan eessatti fi akkamitti akka baasan hin beekan. Fasaanni (badiin) guddaan addunyaa irratti kan babal'ataa jiru sababa baay'inna qabeenyaatin. Boombii fi nuwkilariin namoota nagahatitti roobsan sababa baay'inna qabeenyatini mitii? Qabeenya sirnaan yoo itti hin fayyadamiin namtichaaf badii taati. Iccitiwwan galii gaarii itti argatan keessaa tokko qabeenya sirnaan itti fayyadamuudha. Wantuma arganirratti bitteenessu dhiisudha. Qabeenyi amaanaa Rabbiin nama bira kaa'edha. Guyyaa fedhe namarraa fudhata. Qabeenyi kiyya jedhaniiakkuma fedhan itti taphachuun of gowwomsuudha. Qabeenya sirnaan fayyadamuuf:

**a. Wanta itti fayyadamtuu qofa fi hanga murtaa'a ta'e biti**— namoonni gariin wanta lubbuun isaani feetu hundaa walitti haruun gara manaa fidu. Wanta lubbuun isaani feetu hundaa ni bitu, hanga hin beekan. Qabeenya isaani wanta isaan hin fayyanne bituun qisaasessu. Mi'eessituwwan galii kee guddisan keessaa tokko wanta ammaaf si fayyaduu fi hanga murtaa'a bituudha. Fakkeenyaf, uffata yoo bitu barbaadde, ji'a ji'aan bitu osoo hin ta'in, waggatti al tokko ykn lama bitudha.

**b. Wanta si hin fayannee fi miidhu dhiisi**— wantoota miidhaa sirraa fi maatii keetirraan gahan kanneen akka caati, sigaraa, biiraa, fi kkf fayyadamuu irraa dheessi. Kuni fayyaa fi qabeenya kee miidha. Akkuma wanta fafee kanniin fayyadamtu hiyyeessa taate hafta. Ol hin guddattu. Sababni isaas, araadonni kunniin sammuu hadoochu, qabeenyatti salaabi ta'u. Kannin irraa dheessun kabajaa fi qabeenya kee eegudha.

**c. Hin qisaasessin**— namni qabeenya qisaasessu qabeenyi isaa baraka (tola) hin argattu. Qisaasessu jechuun qabeenya baay'e bakka sirrii ta'etti baasu osoo hin ta'in qabeenya xiqqatus guddatus bakka sirrii hin taanetti baasudha. Warroonni qabeenya qisaasessan obboleeyyan sheyxaanati (Seexanati). Sheyxanni Rabbitti kafaruun daangaa Isaa darbe jira. Namoonni qisaasessaniis qabeenya isaanitin daangaa Rabbii darbu. Kanaaf obboleeyyan sheyxaana jedhaman. Rabbiin (Subhaanahu wa ta'aala) akkana jedha:

**"Yaa ilmaan Aadam! Masjiida hundaa biratti faaya keessan qabadhaa (yommuu salaattanii fi Kaaba irra naannoftan uffata qulqulluu uffadhaa). Nyaadhaa dhugaa, garuu hin qisaasessinaa. Dhugumatti Inni (Rabbiti) warroota qisaasessan hin jaallatu."** Suura Al-A'araaf 7:31

Kanaafu yommuu nyaannu fi dhugnus baay'isne soorachuu qisaasessu hin qabnu. Nyaata hanga itti fayyadamnu qopheessun itti fayyadamu qabnaa malee gabataa guutu qpheessun boodarra kositti darbuu hin qabnu.

Kanaafu iccitiwwan galii keessaa tokko qabeenyatti sirnaan fayyadamuu fi qisaasessu dhiisudha.

**d.Ijoolletti qabeenya kee akkuma argite hin kenniin**– ammas Qur'aanni ijoolletti ykn namoota sammuun bilchinna hin qabnetti qabeenya keenya akka hin kennine nu gorsa.

**“Qabeenya keessan kan Rabbiin dhaabbata jirenyaa isiniif taasise gowwootatti hin kenninaa. Ishee (qabeenya) irraas soorata isaanif kennaa, isaan uffisaas, jechoota kabaja isaanitti dubbadhaa.”** Suura An-Nisaa 4:5

Asitti gowwoota yoo jedhu ijolle fi namoota bilchinna sammuu hin qabneedha. Maatii meeqatu qabeenya isaani akkuma argan ijolle isaanitti kenuun ergasii ijoollen isaani kashlabbee fi hattuu jalaa taate. Wanta ijoollen feetu hundaa bituunis kashlabbee isaan taasisa. Keeyyata Qur'aana armaan olii keessatti wantoota afuritti ajajamne tokko qabeenya keenya akkuma arginee ijjolle fi namoota gowwaatti kenu dhiisu, lama isaan sooru, sadii isaan uffisuu, afur jechoota gaarii fi kabajamoo isaanitti dubbachuudha. Kanaafu seera kana hordofuun qabeenya fi ijolle teenya sirnaan guddisuu dandeenyaa.

Tola maatiin koo narratti oole yoo amma takkaa taa'ee itti yaadu, qarshii akkuma argan natti kennuu dhiisun isaani tola guddaa akka ta'e natti dhagahama. Alhamdulillah maatiin koo sirnaan nu soorus nu uffisuu turan. Qarshii yommuu gaafannu, "Maal ittiin goota?" jechuu turan. Wanta binne irraa hafteen yoo jiraate, "Fidi" jedhu. Haala kanaan kashlabummaa fi wanta gadhee raawwachu irraa nu eegaa turan. Akkuma argine qabeenya keenya ijjoletti yoo kennine boruu ba'aa guddaa nuu fi ofirratti fe'u. Hannaan qaccee keenya kutu. Kanaafu iccitiwwan galii itti guddisan keessaa tokko ijolle fi namoota sammuun bilchinna hin qabnetti qabeenya kenu dhiisudha. Bakka kanaa isaan sooru, uffisuu fi jechoota gaarii itti dubbachuudha.

**e.Namoota hin akkeessin**– yeroo ammaa namoonni wal akkessuun qilee baditti of darbaa jiru. Eebalu kana bite, anille kana bitu qaba jechuun qabeenya ofii bakka hin taanetti qisaasessun idaa ulfaatatti galu. Fakkenyaf, telefoona haarawa yoo nama harkatti argan, telefoona san bituuf qabeenya isaani haaxawanii gurguru. Ergasi rakkoo cimatti seenu. Kanaafu akka ollaatti bulaa osoo hin ta'in akka mataa keetti buluuf carraaqi. Namoonni naa haa arganii fi na haa jajaniif jette wanta humni kee hin dandeenye ofitti hin baachisin. Namoonni naa haa kabajaniif jette uffata qaali bituuf of hin dhiphisin, idatti hin seenin. Wanta namoonni waa'ee kee ilaachise jedhaniif gurra hin kenniin. Karaa kana jalaa itti baatu sitti himuu? Karaan kunis Rabbiin qofa gammachiisuf carraaqudha. Namoota nan gammachiisa yoo jette fedhii namoota kumaatamitti lakkawaman guutuf carraaqxa. Kuni immoo humna keeti oli. Garuu Rabbii tokkicha qofa nan gammachiisa jette yoo carraaqxe ba'aan kuni hindii sirraa bu'uun gammachuu fi tasgabbii argatta. Namoota akkeessuf oli gadi hin fiigdu.

**7.Hariiro firummaa eegu fi sadaqaa kenuu**– meeqa keenyatu hariiroo firummaa fi sadaqaa (kennaa) kenuun jirenyaa keessaa gammachuu dhandhamaa jirraa? Osso wal jibbinuu fi hariiroo firummaa kukunnu qabeenya keessaa barakaa (tola) haaqna. Wal gaafachu fi walitti dhufuun duraanitti hafe. Dhugumatti akaakilee keenya jirenyaa mi'aaya jiraata turan. Sababni isaas, wal gaafatu, walitti dhufu, wal gargaaru, jibpii walii qaban baay'ee xiqqaadha.

Karaan qabeenya keenya ittiin guddisnu keessaa tokko hariiroo firummaa eegudha. Ergamaan Rabbii (Nageenyi fi rahmanni Rabbii isaan irratti haa jiraatu)akkana jedhu:

**“Namni sooranni (rizqiin) isaa akka bal’attuu fi umriin isaa akka dheeratu barbaade, hariiroo firummaa haa eegu.”** (Sahih Al-Bukhaari)

Rahimummaan (firummaan) haadha abbaa irraa ka'uun obboleessa, obboleetti, adaada, eessumma, abbeeraa, akka'oo, akaakayyu, soddaa fi kkf of keessatti hammata. Hariiroo kanniin eegun jaalala maatii cimsuun qabeenya dagaagsa. Wal waanyu fi wal jibbuu haaqun hundee cimaa ijaara. Tokko tokko gargaarun salphinna irraa wal tiksu. Meeqa keenyatū haadha abbaa keenya kunuunsaajirra? Meeqa keenyatū daqiqiqa muraasaf adaadota, eessumoota fi abbeerota keenyaa bilbille nagaha gaafanna? Yommuu qarshii wanta hin taane irratti baasnu garaa nu hin nyaattu yommuu firoota keenya irratti baasnu garaa nu nyaatti. Doy'a hin ta'in, bilbiliif, nagaha jedhiin Insha Allah qabeenya kee keessatti barakaat argattaati.

Karaan biraan qabeenya keenya itti daballu jaalala Rabbii argachuuf sadaqaa kennudha. Sadaqaa yommuu kenninu niyyaan (yaanni) keenya qabeenya keenya guddisuuif ykn namoota irraa kabajaa fi galata argachuuf osoo hin ta'in "**Jaalala Rabbii argachuu fi jirenya boodaa (aakhiraan) bitachuuf**" ta'uu qaba. Akkuma sadaqaa kennuuni fi Rabbiin sodaannuun jirenya salphaa taati. Kunoo Rabbiin nama sadaqaa kennuu fi doy'a haala Kanaan wal bira qaba:

**“Namni (sadaqaa) kennatee fi Rabbiin sodaate; Al-Husnaa (mindaa gaarii Aakhiraa) dhugoomse, karaa laaftu (gara gaarummaa) isaaf ni laaffifna.**

**Nama doy'oome fi of gahe (Gooftaa isaa hin barbaanne), Al-Husnaa (mindaa gaarii Aakhiraan) sobsiise karaa jabduu (gara badii) isaaaf ni laaffifna.” Suurat al-Layl 92:5-10**

Kanaafu akkuma sadaqaa kennuuni fi mindaa gaarii Rabbiin irraa eegnu jireenyi teenya laafaa fi nu salphataa adeemti, hojiiwwan gaggaari hojjachuun nuuf salphata. Akkasumas akkuma doy'a taanu fi Rabbiin irraa garagalluun jireenyi jabataa fi balballi badii nutti banamaa adeemu. Mee haa ilaallu warra sadaqaa hin kenniine badii isaan raawwatan. Karaa badii ibiddatti isaan geessu isaanii baname jira. Sadaqaa kennuu dhiisanii alkooli ittiin dhuguu, sigaaraa ittiin xuuxu, caati ittiin qama'uu fi kkf raawwatu. Kanaafu badii irraa eeggamuu fi jirenya gammachuu jiraachuf sadaqaa kennudha.

**8.Taqwaa**— taqwaa (Rabbiin sodaachu) jechuun ofii fi adabbii Rabbii jidduu, Rabbii ajajamuu fi wanti Inni nama dhowwe irraa dhowwamuun, eeggumsa (girdoo) kaa’u jechuudha. Jecha biraatin namni tokko ajaja Rabbii bakkaan gahuu fi wantoota Inni dhowwee irraa dhowwamuun adabbii Rabbii ofirraa deebise jechuudha. Fakkeenyaf namni tokko Rabbiin sodaachun sagaagalummaa raawwachuu, alkooli dhuguu fi kkf irraa ni dheessa. Kanaafu sodaan Rabbii adabbii sagaagalummaa fi alkooli irraa dhalatuu nama kanarraa deebise jechuudha. Haaluma kanaan Rabbiin sodaachun qabeenya karaa haraamatin (dhowwamaatin) argachuu irraa yoo dheessite adabbii ofirraa deebisuun qabeenya keessa barakaan ni ka’ama. Fakkeenyaf alkooli, sigaraa, caati fi kkf gurguruu, nama gowwomsuu, malaamaltummaa, mattaa fi kkf irraa yoo dheessite jirenya badhaadhinna jiraatta. Rabbiin namoota Isa sodaatan Rakkoo keessaa isaan baasa, bakka isaan hin yaanne isaan soora.

**“Namni Rabbiin sodaatu (Rabbiis) karaa bahiinsaa isaaf godha. Bakka inni hin yaadin irraayis isa soora. Nama Rabbii irratti hirkatuuf Inni isaaf gahaadha. Dhugumatti Rabbiin ajaja isaa bakkaan gahaadha. Dhugumatti Rabbiin waan hundaifu hanga sirraawaa taasiseera.** “ Qur'aan, Suurat Ax-Xalaq:2-3

Yommuu ati Rabbii jette wanta badaa dhiistu, Inni karaa san caalaa bal'aa fi gaarii si bana. Akkuma ati Rabbiin faallessituu fi daangaa Isaa dabartuun qabeenyi kee barakaa dhaba, gammachuu fi tasgabbii hin argattu. Kanaafu iccitiwwan galii keessaa sadetaffaan Rabbiin sodaachudha. Qabeenyi kiyya xiqqaadha jechuun haraamatti harka hin hiixatin.

**9.Du'aayi**– jirenya tana humna keenya qofaan moo'achuu ni dandeenyaa sila? Osoo ifajnu yeroo meeqa kufnaa, kasaarrraa. ?ccitiwwan galii keessaa inni sagalaffaan Rabbiin irraa qabeenya gaarii fi nama hin balleessine kadhachuudha. Rabbiin addunyaa fi Aakhiraatti waan gaarii argachuuf du'aayi tanaan akka Isa kadhannu nu jajjabeessa:

????????? ?????? ??? ?????????? ?????? ?????? ?????????? ?????? ?????????? ?????? ??????

**“Gooftaa keenya! Duniyatti toltaa, Aakhirattis toltaa nuuf kenni; adaba ibiddaa irraa nu baraari.**  
” Suura Al-Baqaraa:201

**10.Galata galchuu**– dhugumatti ilmi namaa hiyyeyi fi of tuultota. Yommuu dhabanii fi rakkatan gara Rabbii fiigu, yommuu argatan immoo galata Isaa galchuu dhiisanii irraa garagalu, oftuulu namoota lakkofsi isaani xiqqoo ta'ee malee. Rabbiin immoo namoota akkanaa hin dhiisu haloo bahaaf malee. Galata yoo Isaa galchinee mata keenyaf yoo irraa garagalles matama keenya miina.

**“Yeroo Gooftan keessan, “Yoo Na galateefattan (qananii kiyya irraa) isiniifin dabala. Yoo natti kafartan, dhugumatti adabni Kiyya akkaan hamaadha.” Jedhee labse yaadadhaa.”** Qur'aan, Suura Ibraahim 14:7

Rabbitiin galateefachu jechuun afaaniin qofa Alhamdulillah (Faaruu fi Galanni hundii kan Rabbitiiti) jechuun qofa osoo hin ta'in fayyaa fi qabeenya Inni nutti kenne karaa sirrii Rabbitiin jaallatutti itti fayyadamuu fi baasudha. Fayyaa osoo qabnu yoo Rabbitiin gabbarre, qabeenya keenya sadaqaa kennuu fi amantii Isaa tumsuuf yoo hojii irra oolchine Rabbitiin galeefachaa jirraa jechuudha. Ta'uun baannan garuu qabeenya fi fayyaa keenya bakkuma arginetti yoo itti taphanne Rabbiti galata galchaa hin jirru jechuudha. Kanaafu durummaan sobame halaakamu (baduu) irraa Rabbitiin nu haa tiiksu. Namoota meeqatu durummaan daangaa Rabbiti darbuun nafsee ofii miidhaa jiru! Sababa durummaatinii mitii wantoonni fokkuun akkanatti addunyaa irratti baay'atan? Kanaafu qormaanni durummaa qormaata hiyyummaa akka caalu beekun of haa eeggannu. Qabeenya qabnutti fayyadamne daangaa Rabbiti darbuu fi dirqama Inni nurra kaa'e dhiisu/dagachuu irraa of egganno haa goonu.Kanaafu karaa fi iccitiin galii itti argatanii fi eegan inni kurdaffaan Rabbiti galata galchuudha.

## Gudunfaa

### Iccitiwwaan Galii hanga ammaa ilaalle kana fakkaatu:

1. Kaayyoo murteefachuu
2. Gara Rabbii deebi'uu fi araarama kadhachuu
3. Hojjachuu fi carraaquu
4. Rabbiin irratti hirkachuu
5. Karaa halaalatiin (seera qabeessan) galii barbaadachuu
6. Karaa sirrii irratti fi haala sirriin baasu
7. Hariiroo firummaa eegu fi sadaqaa kennuu
8. Taqwaa (Rabbitiin sodaachu)
9. Du'aayi (Rabbitiin kadhachuu)
10. Galata Rabbii galchuu

#### Date Created

October 8, 2016

#### Author

admin